




祭輓彙錄卷九

祭文

維

康熙五十五年歲次丙申夏四月庚寅朔越六日
乙未年家眷教弟余士觀汪光元閔寬吳鄴江濬
方昭盧琮李天祚程蓮程之秩方願德朱嘉復吳
延祿程循程煊眷教小弟程寅賓汪達黃健汪文
煥吳景洋吳景游汪文菁眷姻弟方瑜眷姻晚生
江瑞程振箕眷姻晚學生閔獻謹以清酌庶品之
儀致祭於

皇清誥封光祿大夫內閣中書加十二級景翁項老先



國朝

生之靈而言曰嗚呼扶輿間氣蟠結東南鍾竒毓
秀淮海之間降神篤生惟公名德邁倫拔萃爲世
楷則仰事高堂誠孝備至推恩姻族仁誼周摯敬
於友朋質直好義不激不隨冲融純粹嗚呼天生
俊傑用舍有時出爲霖楫退亦羽儀跡有顯晦道
無隆替克善其身亦名於世於惟我公光明磊落
人傑物華行思可樂掉鞅藝苑領袖英游氣摧王
孟目短錢劉怡情悅性以其餘閒義琴姬鼎玉軸
牙籤罇壘花月嘯咏流連膝前騏驥倜儻騰驤惟
賢有後奕世克昌蕃衍世澤庭訓彌芳孫曾卓犖
玉樹凌霄萬石謹厚群季英豪嗚呼公之謀謨爲

時金玉公之志節爲士標鵠公之意氣冰晶霞鬱
公之形儀蒼松勁鶻公之精靈日星炳煜振翼雲
霄炎歆霖雨經理群生儉歲稷黍昊天不弔溘喪
偉人飈輪迅駛浩氣返真車過腹痛思念牀琴我
安適歸俗且奚倣不歌不相維揚之壤覲等欽式
楷模益深瞻矚爲嘆靈光乃傷梁木澗芷溪毛望
公式臨輝光下燭哀哉尚

饗

維

康熙五十五年歲次丙申四月庚寅朔越三日壬辰年家眷教弟閔寬率男晚生期長寧長虹長椿長豐制長祿孫晚學生廷標廷佐廷卿廷颺廷宣廷垣廷雯廷馥廷樑廷睿廷熹期廷弼廷隲曾孫懋官懋簡懋簪懋昭懋遷懋勳等謹以瓣香束帛清醑庶羞之儀致祭於

皇清誥封光祿大夫內閣中書加十二級景翁項老年翁之靈曰嗚呼自昔漆園曠達而謂生寄死歸則此身去來安足問哉雖然行誼卓犖異彼庸碌生有可師死寧可忘耶余與翁相交數十餘年翁之

生三余所稔悉為約略大端而涕隕有弗能禁也
翁少而穎異游學武林與冢宰徐公同出宿儒張
君之門一時以文章獲名譽者未能出其右以高
堂垂白則後於功名而亟於奉養因來揚州理鹽
筴養生送死人咸謂其禮之盡而情之至也東海
徐大司寇為海內宗師折節於翁而高宗伯泊當
代名卿亦俱聲氣應求持節視齎之使無不資理
於翁

平華南幸問民疾苦翁首叩披陳請發帑金
聖主嘉予賜食賜書准之商荷
殊恩者皆翁力也而翁不稍為矜伐遇紛難悉為排解

瞻宗族教養之方靡所不至暇則作書自娛人得
隻字寶若珠玉癸巳春公率同人詣京師祝

萬壽行次中道違和而返嗣君皆致身通顯因告歸盡
其愛日之誠而翁竟以今歲閏三月溘然長逝嗚
呼翁之所以承天與天之所以報翁者不為不厚
而哲人其萎典型云亡此舉世所同悲悼也余老
懶家居課子若孫思有以方翁之行誼而未能逮
回思數十年來衡宇相望把臂過從所以奉翁之
教者忽有人琴之感感其又曷有涯哉薄奠敬陳
以叙平時交契靈其不昧來格而歆此一觴也嗚
呼尚

維

康熙五十五年歲次丙申四月庚寅朔越三日壬辰年家眷弟程特率姪渭航文桂渭宿文階文炳文昭姪孫制夢星夢鼐夢松章謹以辦香束帛清酌庶饗之儀致祭於

皇清誥封光祿大夫內閣中書加十二級景翁項先生之靈而言曰嗚呼視天道之高遠嗟神理之虛無竟愍遺之不獲致哲人以長徂公務將於誰而借著名流將於誰而式廬人倫何所表其風範鄉國何所仰其訏謨世交至誼如余者能不灑淚而驚乎耶惟翁秉傑出之姿而規言矩行負用世之具

而藏避匿瑜孝友通於神明而欲若不足文翰著
於藝圃而讓焉弗居陳請

內廷則淮海資其碩畫推恩故里則族黨賴以沾濡宜
乎堂輝

宸翰饌飫

天廚策引年之鳩杖拜錫命之

鸞書香襲薇垣冢嗣含毫以入直風高秦塞次君叱馭
而長驅以至叔季孫曾舉是亢宗之瑞行見期頤
耄耆長欣化日之舒奈何靈光忽圯碩果乃枯耶
昔我伯兄之與我翁也持古道以相照挽末流之
卑汙玉潤金堅披衷腸而如揭巾縈手拂乘暇日

而為娛是以舍姪渭航通家既久世講勿虛經士
世兄暨姪孫夢星習業既同攻鉛槧策名更締好
簪裾特以僑寓淮陰未得時親麗澤每來邗上則
獨心契中孚方意翁之茂膺天眷式永令圖今也
鴻潛瀚海鳳去高梧豈曼倩之歲星黯黯抑莊周
之蝶夢蘧蘧雖翁之福備九疇名自登於仙牒而
特之交三世腹倍痛於迴車俚言用誅載齋清
醑翁其式臨鑒我欵欵尚

饗

維

康熙五十五年歲次丙申四月庚寅朔越三日壬辰年家眷教弟制程蓮率男晚生期熙炘炯煦謹以瓣香束帛清酌庶饘之儀致祭於

皇清誥封光祿大夫內閣中書加十二級景翁項老年臺先生之靈而言曰嗚呼君負偉略練達老成上裨國計下協輿情一朝淪謝疇不悼驚矧復舊好曷禁淚傾遡厥華胄歛南挺秀奕葉清芬金章紫綬君生穎異天才夙構揆藻詞壇千言立就士林推之青雲是期而君大志志在濟時謂是雕蟲壯不為迺來邗上振業於茲管樂竒才大抒懷

抱利與仇、鬪悉心搜討、未雨綢繆、知幾於早、每建
謨猷、公卿傾倒

翠華南巡、勤恤商民、君偕同輩、率先叩陳
天顏、和霽煦燠如春

宸章頒賜、光寵聿新、海內鉅公、聞風心喜、折節願交、冠
蓋盈里、排難解紛、義聲灌耳、季布彥方、差堪比擬
至若內行孝友、篤誠推恩、三黨誼重、死生扶危、濟
困不以仁名、用是獲福、後起崢嶸、長公蚤貴、承明
視直爰邀

恩綸榮封、殊格次公、筮仕政聲、嘖嘖群季、齊名如珪、如
璧、孫曾滿庭、絲絲世澤、食報如君、庶稱其德、壽考

令終遐邇、歎惜余思、盛德藹藹、如雲一夕、騎箕雙
袂、永分追念、夙昔泣然、沾巾聊陳、薄奠、鑒此誄文
嗚呼尚

饗

維

康熙五十五年歲次丙申四月庚寅朔越三日壬辰眷教弟吳鬱眷教小弟吳景洋馬建吳景游眷晚生羅星潞汪文菁程庭朱珣期汪德齡謹以辦香束帛清酌庶饁之儀致祭於

皇清誥封光祿大夫內閣中書加十二級景翁項老先生之靈曰嗚呼昔人有云中年傷於哀樂每與親友別輒作數日惡別猶不忍况生死契闊哉嗚呼翁之著望於兩淮也幾五十年余輩之交於翁也雖有久近少長之殊縞紵葭莩之別然而一經傾蓋印泥迥春風瞻霽月而鄙吝自消一聞緒餘又

如三經言人物志而弘博無盡至其盛德感人久而益摯則如飲公瑾之醇而使人自醉也翁以絕異之質於書無所不讀默識神解江浙宿儒莫不以大器期之因以尊人甘毳為念遂挾策以遊仰佐司農廣陵鹽賦甲天下爰決計定居業駸駸日起由是而善養祿養並極一時之盛凡鍾鼎之奉誥封之榮喪葬之誠至今人爭稱之翁雖託於市隱而維揚水陸之衝縉紳先生冠蓋交錯耳翁之名莫不願交締好督鹺諸當事亦必諮諏以收匡襄之益蓋鹽政關乎

國計盈縮利弊每有變更當其聚議言人人殊衆莫知適從翁則不動聲色徐以一言判其當否上而九重之高下而四省之遠及夫議定事行若燭照數計曾無毫髮之差是以疊沐

皇恩頻邀

曠典皆翁首任其事者也後以嗣君婚宦既畢於新安山水佳處卜築為娛老之計而鹺務殷繁方藉老成籌畫同人敦請再四當事皆手札相招因復往來於徽揚兩地在翁雖未遂高尚之志而余輩幸晨夕相依年踰七十飛觴卜夜敲句揮毫不讓詩豪草聖蓋其老而益壯如衛武公之好學不倦羅潔之見德下衰恭以持身無富貴驕人之氣儉以

論後無裘馬角勝之風身封一品芝玉滿前長君
職膺粉署次君任重外臺從此而耄耋期頤宮錦
綵衣展稱觴之慶余輩追隨杖履豈不甚快何期
臥疾未久而遂身騎箕尾也耶嗚呼仲春之月汪
君周士即世余輩服朋友之服為文哭之翁其首
也奈何遂以薤露之歌陳哀靈几翁亦有無離群
索居之歎也耶嗚呼尚

饗

維

康熙五十五年歲次丙申閏三月辛酉朔越祭日
戊子年家眷晚生黃鼎謹以清酌庶饘之儀致祭
於

皇清誥封光祿大夫內閣中書加十二級耐菴項老先
生之靈曰嗚呼人之生死猶天之旦暮天不能有
旦而無暮人不能有生而無死惟名聲昭於時利
澤施於後者則生享備福歿有餘榮耳余往來南
北獲從先生之次君副使公交有年於是知先生
有素先生天性純孝友于兄弟推恩族屬逮惠外
家少有異姿噪名場屋工為詩文輒膾炙人口以

高堂需養小試計然之策業齧於揚而所與遊者皆一時名公鉅卿聲望達於輦下

翠華南幸 詔見行幄詢民間疾苦先生極陳齧弊條

對詳明因

賜御書克食遂得

溫旨借帑緩征商困賴以頓蘇他如修講堂以培後學築潰隄以絕水患生平懿行筆不勝書於是食報於天有賢子孫光大其後可謂生享備福歿有餘榮者矣獨是以先生之樂善不倦當壽躋期頤乃遽爾脫屣塵世騎鶴上昇則自今以往後來之彥於何考德而問業淮南利弊孰為區畫而興革宜

乎人情之不能無咨嗟痛惜也矧余忝知交之雅親聆教益曲荷惓惓今一旦登其堂不復聞先生之馨歎其何能無耿耿於中耶用陳桂酒侑以蕪詞以前所稱為先生頌以後所稱致余向慕之私也靈兮有知嗚呼尚

饗

維

康熙五十五年歲次丙申四月庚寅朔越三日壬辰年家眷晚生汪修業黃名嘉魏盥卞汝燦方職汪景星羅星潞王模汪守仁汪民衡江宣儒吳遴徐瑞玉程庭程璟汪清揚吳文輝陳雷洪鶴竒汪鶴齡程瑋程珣吳為潤程連程逢年汪鴻儒眷晚學生程煒吳文璟汪文廕吳文瑤閔烜汪元貞許應嵩謹以剛鬣柔毛清酌庶羞之儀致祭於

皇清誥封光祿大夫內閣中書加十二級景翁項老年太翁先生之靈曰嗚呼天厚人之有德將以振起家聲不獨於其身而且於其子若孫濟美繩武此

其數之屈伸消長若不可知而未嘗不可必之於其理也以公之孝於兩親敬事諸父友愛從昆弟數十年之間一門之內怡怡愉愉而三黨之中殫力調恤陰德隱善更僕數之不能盡也至其辨論古今抵掌時事其氣無所不勝其才無所不辨名籍籍一時故四方賢公卿皆想慕丰采冀得一見也夫賢人君子受氣質於大造得其剛大洪碩者以爲致用之具使公得用於世展其才以有爲豈非所謂榮名顯當時休光垂後世者哉奈何遽爾騎箕令人瞻榱桷几筵而下永訣之淚乎將世道之江河誰與砥柱人事之坎坷誰與扶持在公存順沒寧全受而全歸而仰賴於公者百身莫贖則傷如何矣嗚呼公之行誼在人倫聲聞在家國以其未竟之緒貽厥象賢異日抒爲豐功大猷行將金石相宣日星并朗是公雖長逝而公網維群彙之襟期措拄紛錯之事業未嘗與之俱往也景慶生於積謙芬榮發於旣謚夫豈偶然之故哉惟是泰山其頽小子何依哲人其萎教我其誰敬奉總帳陳此哀辭辨香卮酒公其鑒之哀哉尚

饗

維

康熙五十五年歲次丙申四月庚寅朔越三日壬辰年家眷晚生程鍾周廷亨黃彝程鶴疑程國柱方為源江澧洪玉麟洪鶴圃朱文光黃以禎吳椿齡黃宗鼎吳鏞方椿吳鏞洪鈺陸時達閔長升吳伯緒卞恒久許龍友巴士廸程兆奕吳荷汪正鉉劉正實巴錦黃如琳江斌曹寬巴鎮崔起岱許昌禋汪彭齡吳家龍黃履易謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項老年臺先生之靈曰嗚呼大江之東山川蕩激百谷所

宗群靈所宅乃產英賢金堅玉栗盛世羽儀人倫
矜式少負大志折節下學雋拔不群承家述作秉
心惟仁制事以義物躬惟禮周物以智方圭圓璧
金鐘大鏞濟時霖穀表俗君宗町畦莫存持躬率
俗清不違時載胥能淑沈毅者謀剛大者氣磊落
英多含弘沛濺公之平生老成之望遺大投艱達
變守常爰用儒術屈首為賈志在養親榮祿何補
持籌以計聲譽日起光前裕後克家濟美瓊流合
源珠樹蟠根我公之德實大以繁超景籥雲膝前
神駿驚彩葩流澄懷淵映玉茁蘭芽孫曾競爽允
熾允昌門風高朗里名通德人師仲弓醇醪飲物

和氣冲融嗚呼我公以才起家以德及人錫予章
服命錫楓宸在朝在野以同而異位不竟德被於
來祀自天邁閔大椿折摧人琴旣杳曷極其哀白
日昭昭長夜悠悠清淚沾臆緬想風流公多令子
厥後克昌繼繼繩繩奕葉彌光嗚呼我公翼燕詒
謀所不沒者卓然千秋靈其有知抑亦何憾白駒
過隙交遊永歎鍾等時瞻山斗載炙蘭薰幽明異
路涕泗何云薄奠桂醑將此誠篤駕麟驂螭公乎
來復哀哉尚

饗

維

康熙五十五年歲次丙申四月庚寅朔越五日甲
午之辰年家眷弟李浩孫諤申大紀柴瑗高懋坦
趙拱辰師怡喬國楨負履端李選張世廕王仁洪
負夢弼李宁馬遠喬銓宋時勸申際亨因必适李
英喬嘉徵茹世寧等謹以辨香束帛清酌庶品之
儀致祭於

皇清誥封光祿大夫內閣中書加十二級景翁項老封
翁之靈而言曰嗚呼人欲澤被一時聲稱後世而
苟無其德則雖感奮激昂振拔流俗曾不旋踵而
輒罷故往往欲爲善而不能或爲之而不卒者以

貪吝之情動於中人我之見形於外也烏足自立於賢豪間耶惟我太翁歛南望族代有偉人至太翁生而穎異博學鴻才老師宿儒多所推服後棄帖括理鹽筴凡所規畫動中窾要數十年間興利剔弊兩淮尊為祭酒焉居恒無疾言遽色處已以恭與人以和而性樂施與婚嫁不能則遺之喪葬不舉則助之其待以舉火者正不知幾何家凡若此者不獨近今無其人即於古人中求之亦寧多覲哉乃若天性之愛最深一本之誼尤篤高堂迎養於蕪城晨夕無違於定省薦享宗祠屹成崇構置義田贍族人作橋梁通道路築石隄而費且盈

萬是真仁心為質非矯強而然也蓋嘗論福善禍淫之理有毫髮無爽者書曰作善降之百祥今太翁履豐席厚晉階一品

寵錫龍章其福可謂全矣齒逾古稀聰明不衰其年可謂壽矣嗣君入薇垣膺民社文孫玉潤蘭芬爭竒競秀不可謂不尊且榮矣以是而令終亦復何憾浩等夙叨樾蔭久切儀型一旦覲哲人之云亡恨老成之遽謝招仙靈而不返追素車以無從能勿悲從中來涕淚交橫乎祭酒盈樽靈其來格尚

饗

維

康熙五十五年歲次丙申夏四月庚寅朔越五日
甲午年家眷晚生郭振基李榮業盛璋郭建基張
銑梁文絢張潔儒李廷琅申培楹韓鑰劉裡孫繡
衛中璘申爾堪張瑜房國明喬曷喬麟紱郭鏊郭
鏊等謹以剛鬣柔毛辨香束帛清酌庶饗之儀致
祭於

皇清誥封光祿大夫內閣中書加十二級景翁項太翁
之靈而言曰嗚呼世風不古端賴維挽之人俗尚
還醇必賴老成之輩方謂伏生無恙將駕蒲輪豈
期傳說云亡遂騎箕尾訪東園而絕跡仰南極而

無輝道路於焉涕零鄉國爲之震悼惟我太翁毓
黃山白嶽之精承奕禩書香之澤仁慈出於夙秉
孝友修於家庭定省承歡惟知養志松楸眷慕克
展孝思篤意本源興築故山之墓乃心追遠復修
昭穆之祠念祖功而建立閔堂思宗德而訪求遺
像滌溪有室構焉而頓復舊觀德聚名堂新之而
無忘先澤絲粟皆公羣從使豐足而後即安寢食
難忘孤貧俾生全而始稱快義田贍給萬人衣食
皆饒石堰增修千室居廬永庇推不匱之愛施及
外家延旣絕之宗加恩舅氏爾迺魏崇廟貌丹雘
黌宮德著儒林功尊文教至於樂善不倦利濟爲
懷謙謹方石奮之高風排解並魯連之雅望持籌
鹽筴領袖江淮數十年綜理辛勤百千萬軍儲倚
藉節使虛已以下交宰執造廬而投契

天章疊錫

宸翰特頒豈涼德以倖邀非無本而妄致基等夙叨世
講久奉儀型惟願坐享期頤世上休徵畢集奈何
言歸蓬島人間祿養長辭咏梁木而神傷賦楚招
而心慟然家庭之燕翼即邦國之鴻猷膝下琳瑯
皆

熙朝之柱石堦前蘭桂盡廊廟之楨材太翁何勿怡情
於王府含笑於泉臺耶薄陳一奠聊表寸忱靈其

有知庶來昭格尚

饗

維

康熙五十五年歲次丙申四月庚寅朔越三日壬辰年家眷教小弟黃健眷晚生胡有容程毓洛吳遴易遐齡江注江承繡方職程兆奕制江焜吳弘謨制江學姻晚生洪如旦江承瑜謹以瓣香束帛清酌庶品之儀致祭於

皇清誥封光祿大夫內閣中書加十二級景翁項老先生之靈曰嗚呼天下之可以死而不死者不知幾千萬人也夫此幾千萬人生既無益於時而死復無聞於後則雖生猶死也天下有雖生猶死之人而後知天下之有雖死猶生者惟翁歷年七十有

三而不朽於天下者非復有生之年所得而限矣
蓋公砥行礪名賦性孝友迎親就養履險如夷雖
比德曾閔亦不過焉宜彼蒼之弗靳純嘏也瞻賙
貧窶篤厚親朋視中表之先塋控豪家而得返其
侵奪之地見博士之黜退訴學使而明其不白之
冤贖鬻身而復爲良人歸子女而得成完族宜感
應之繇以大曆也公尤篤於本源修治先冢考其
歷久湮沒者亦必求索而得仍復繪圖傳後以示
久長構家廟築石堤修學宮舉凡興廢舉墜之事
莫不以身任之其於敦本之誼一一欲其致久遠
宜天慶之永以無疆也嗚呼公乃不可復見矣登

公之堂入公之室揖公之子若孫凡公之欲報效
朝廷而猶然藏蓄於中者其子若孫必能光大之行見
立

朝宁建功名以垂不朽則公雖死猶生也公可以無憾
矣獨是徒等泣涕漣漣薦其雞絮而有不能以自
已者蓋自公之謝世而欲求一如公孝友於家恩
惠及人不可復得因切傷夫世之無所倚賴而不
自知其涕淚之泫泫下也公如有靈其鑒茲乎哀
哉尚

饗

維

康熙五十五年歲次丙申四月庚寅朔越二日辛卯年家眷弟易從周率男晚生遐齡孫男晚學生學仁謹以瓣香束帛清酌庶品之儀致祭於

皇清誥封光祿大夫內閣中書加十二級景翁項老先生之靈而言曰嗚呼唯哲人之云萎斯邦國之殄瘁望典型於老成當社祭而豈愧彼衆人之哭公者不同予更難禁夫淚繫公之生扶輿毓靈圭璋令譽蘊美於身秉茲夙慧好德其人溯彼歛南滌溪如玉世名鄉之高第讀傳書於二陸孝友旣其性成仁恕篤於初服中脫褐衣治生何陋持籌鹽

筴莠無自口致豐亨而逸豫爰席昌以履厚種陰
德於于門問丹砂於廖井久為善而最樂篤好修
其無隕天假長年必得其壽飛舄行屏赤松為友
蘭玉盛於階庭麟鳳殊其飛走駕蒲輪之安車岍
鹿巾而修袖菊潭飲伯始之芳芝田掇角里之秀
塵俗乃有斯人浮丘宜其挹袖予與我公謬叨管
鮑敢稱水乳之交濫側山水之調每佳晨輒聽其
謳吟喜花月得同其談笑誌彼解推不忘古道慚
蒹葭之倚玉樹者有年而予之犬子又復承嗣君
之教方期兩世交深共樂其天年而互慶其耆耄
今則幾時茫如隔世猿鶴怨於春山琴樽悲其往

事過橋公而腹痛望黃壚而車躓豈其渺若山河
或已不堪重憶嗚呼公德尊鄉國年邁古稀子孫
貴顯五福攸齊歿雖可以不憾而予獨不能不黯
然以傷悲薦溪毛於几席異來格於靈帷哀哉尚
饗

祭輓彙錄卷九

祭輓彙錄卷十

祭文

維

康熙五十五年歲次丙申四月庚寅朔越五日甲
 午年家眷教弟洪中恪眷教小弟汪克孝眷晚生
 汪吉士謹以辦香束帛清酌庶饗之儀致祭於
 皇清誥封光祿大夫內閣中書加十二級景原項老太
 翁先生尊靈而言曰嗚呼太翁之逝也牛斗星寒
 蜀岡峰折儀型闕寂大雅沈淪此乃遐邇之所同
 悲邦家之所共感者也賢子令孫躡踊震悼肌毀
 骨立弟等謂太翁今日之升遐真生有餘榮沒無

遺憾請略爲言之太翁生而穎異默識超群筆搖五岳之精文擅一時之譽片紙寸墨人競求之當代名儒碩彥莫不心加契重使以此取青紫裕如也乃太翁獨念堂上承歡無他昆季於是淡視功名志專色養生事葬祭一無所忝今之盡子職者莫不於太翁取法焉後繼多賢逾戀東山不肯復出得我內翰經翁副使書翁益振家聲光大其業而叔季兩公亦聯翩鵲起翱翔雲路海內數家世之盛者遂首推項氏且其子若孫彈冠而起者正未有艾也太翁近自頤養天真外惟以吟風咏月窺名園聆仙樂爲事總以諸大孝善能體志承顏

雖家務紛紜不足煩其慮耳乃今厭絕塵氛超然遐舉御風雲而自適棲蓬島而悠然將必登九疑歷玉門躋天漢至崑崙謁西母東君交赤松羨門輩授言妙道而與天地終始矣世俗佩德銜恩者僉謂昊天不弔奪我吉人若將抱憾於無窮不知人當生死之際所不能忘情者惟上而祖父之靈有所未安下而子孫之業有所未立以及利人濟物之事有所未行耳太翁積孝感之誠夢示吉壤以安先靈不惜萬金重構宗祠得千百年先世之遺容而展敬邀

盛朝之曠典以顯親是祖父之靈安矣太翁貽謀以昌

祭輿靈錄卷十
大厥後爲志今則簪笏盈牀蘭桂林立悉是繩武
之良材興宗之美裔是子孫之業立矣且太翁爲
兩淮祭酒迎

鑿貸帑率皆首先拯溺救飢罔不創始自當事以及同
儕無不服其經濟雖太翁雅好謙抑不自矜伐然
其間裨補齟政利濟民生可則可效者自必久而
益著永垂不朽是利人及物之事又無一不行矣
是則生順死安復何所係戀也乎弟等溯昔從遊
久依大廈旣得熟悉太翁之生平及諸位世先生
復不棄下交時賜教益又得書翁在儀朝夕盤桓
世誼之好於茲益篤舊歲書翁由次當補授按察

副使之職乃與內翰公同居在家不即赴選弟等
咸勸曰公當服官之辰霖雨蒼生正在此時乃家
居不仕可乎書翁曰吾非不念此顧家君精神雖
健而春秋漸高膝下之歡安可一日稍缺此所以
與吾兄不欲仕耳嗚呼盛哉太翁盡孝於前諸世
先生盡孝於後人生得此夫復何憾而勢分顯榮
又不待言矣想太翁仙馭來臨方抵掌之不暇豈
尚爲兒孫灑淚乎然弟等非敢臨喪不哀故爲矯
情之論特恐諸大孝哀毀過情或致遺太翁之憂
負蒼生之望故效達人之意而爲是言以冀稍慰
夫悲悼云耳太翁有知其必許之尚

饗

維

康熙五十五年歲次丙申四月庚寅朔越四日癸
巳年家眷小弟程文銘率男晚生制夢麟夢麒孫
晚學生椿齡謹以清酌庶饌之儀致祭於

皇清誥封光祿大夫內閣中書加十二級景原項太翁
老先生之靈而言曰太翁之生也天庥隆渥曰壽
曰富曰康寧曰考令終曰攸好德福咸備焉而且
天爵修人爵從嗣君內班中祕外寮藩臬孫曾輩
或纘紹弘猷或志掇科名赫然鍾鼎四世

恩綸猗歟盛哉太翁含笑九京都人士莫不嘖嘖稱羨
予何獨臨喪悲慟歸途哽咽涕淚橫面交頤不能

止蓋計平生僅得一知己於今而天竟奪之去豈不悲哉太翁下交予三十餘年人情世態不勝浩歎太翁處全盛之日予值困頓之時每以鹽法事下問予杼一得必稱許不置常見之施行予不合時宜且無諂佞才太翁屢為汲引皆厄於時而止若拯予危急不避嫌怨擔當排難不知凡幾間有錢穀之通不予較誠鮑叔知我也嗚呼知我如此而曾一展報歟一旦永訣寧不哭之痛歟謹投泪濡墨一述太翁終始生死交情憶嘗出一函示予曰此鄭某某書今在厄境奈何距數日予過遇之於永言堂之左聽事擁竹烘爐向火病容對予曰

事不可解望拯於太翁也再數十日鄭云亡矣太翁為之請貸於各逋家月餘始就緒謀諸予出所券質之物曰若而引若而票可不負所託矣又數月後所貯於垣之鹽予壻江簡能為之售太翁囑曰此死友物速應之免月息累時在壅詘越半載售畢命予計其子母之數所餘盡往給其家復捐已橐贈焉事惟予獨知而太翁不令人知也一日予將往東河太翁謂予曰吳某死矣子曷代予理其所欠務俾孤寡月給不匱予曰諾至詢其產為富竈所踞予以理說欣然聽從太翁贖還因得有以俾諸孤體太翁志也予薦一友任齏事太翁囑

乃姪書予竊見云所議規例不可刻薄其存心厚道如此有因子故代予償百十緡為其家塋墓資踰年予遇其人始得其情豈獨不俾人知並不予知也嗚呼聊舉予所知者數端何能盡太翁隱德之萬一而太翁之於友道可謂始終委曲心無愧怍矣良友未違老成凋謝嗚呼痛哉雖天之報施太翁者不為不厚而予猶不能無憾於天之奪我知己也予情何極嗚呼哀哉清酒在卮靈其來格

伏惟尚饗

維

康熙五十五年歲次丙申四月庚寅朔越四日癸巳年家眷晚生羅國桓偕男智謹以辦香束帛清酌庶饗之儀致祭於

皇清誥封光祿大夫景翁項太翁年親臺之靈曰嗚呼嘗聞世運有升降古今人不相及此未為定論也天地敦龐淳固之氣流行宇宙無時或絕特人之囿於世運者不能免於庸眾是以有古今人之分而獨行之君子乃能全乎天之所賦而無所虧盡乎人之為道而無所歉是人也即身當叔季而又何古今人之不相及哉如我太翁稟二氣之靈含

五行之秀居三代以下而心期古處垂不朽之名而志切躬行不但爲當世之英也太翁幼而穎悟絕倫博通經史小試輒冠一軍人皆以大器目之旣而迫於養親治鹺江淮意主急公而不敢營私以圖僥倖利戒非分而不敢苛刻以盡錙銖握要提綱興利剔弊爲兩淮砥柱上而當事倚重下而同輩悅服歷數十年無纖毫物議是時他人或有因功受過衆怨叢興者惟太翁清望愈尊令聞愈著非其德之有以感格乎人心才之有以矜式乎同類能如是乎至其事親睦族敬老慈幼與夫義田族譜賑飢濟困一切設施皆可爲後世楷模而

明察果斷見義必爲又足以濟之太翁以勤儉起家箕裘丕振不汲汲於封殖不遑遑於名位林泉娛老旣已酬早歲之勤青紫聯翩又已慰白頭之志年踰古稀

恩榮四世非其德爲人所不能企及而其福又爲人所不可倖致者哉如太翁真全乎天之所賦而無所虧盡乎人之爲道而無所歉者也約略其梗槩亦已度越古人又何古今人之不相及也耶桓忝在通家猶子之誼登翁之堂奉翁之教歷有年所竊見太翁光風霽月接引後輩惟恐不及居平辭嚴義正不可干以私至人有患難緩急相請託必爲

之熟思審處身任勞怨而不辭且里中齒德尊崇
無出其右而太翁謙冲自處雖孤寒童稚必相接
以禮戚友歲時伏臘慶弔問遺無不躬親其事此
尤人所難太翁老而勤學手不釋卷最愛臨摹古
人法書故簡牘往來皆手自裁答一筆不苟如見
端人正士人皆珍秘以爲墨寶暮年聲色不御願
養天真不惑於二氏之學惟以聖賢之道訓子若
孫故居官者恪恭盡職貿易者練達老成呂文獻
柳仲郢之家法不猶在目前乎太翁體素健有長
生久視之槩即大耋期願不足爲壽孰意山崩喬
岳星隕少微一旦而遂抱無涯之痛乎以兩淮砥

柱之一人關於齟政者不小而忽焉徂喪則失所
依歸者不止桓一人大江南北無不巷哭里悲則
其平時之德澤在人心爲何如哉然太翁德無不
全福無不備又有象賢之子孫爲之繼則亦可大
慰於九原矣薄具一奠用達哀思伏惟降鑒來格
來歆尚

饗

維

康熙五十五年歲次丙申四月庚寅朔越五日甲午眷小弟余維璿余維瑛姻晚生洪如昂洪如旦黃道謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太翁之靈而言曰嗚呼太翁竟奄然沒耶四方之人聞訃而咨嗟感悼者將何以為情耶雖然太翁沒而有其不朽者存雖沒猶不沒也夫所謂不朽者何哉太上立德其次立言其次立功太翁固兼而有之矣况德莫大乎敦倫太翁之事親也視無形聽無聲且推事親之心而尊祖敬宗內必盡志外必

備物又推尊祖敬宗之心以親九族而遠近姻戚靡不藹然各致其情至於交友則推誠相與無貴賤無初終咸如一焉或事在隱微不惜解囊橐爲人全功名保性命人亦無得而稱焉如此者豈易更僕數哉而有德者必有言言之立也固不在著書立說苟有裨益國是民生一言之出亦足以垂不朽事有利弊太翁必請興請革慷慨陳於當事無不見諸施行其談言微中可知也即如前此饑饉告侵鳩形鵠面者太翁慘目而傷心贊襄齶憲設糜施賑其所活人豈得以數計哉各場竈戶蝗災海嘯運米給食而中澤獲以安堵非太翁之言

而誰之言乎功立於此矣雖然豈但已也

聖天子鑾輅南巡兩淮疾苦得以上聞

九重恩膏得以下達以及歷任齶憲莫不委任太翁亦

莫不殫精畢慮極力維持爲兩淮興利除弊事難

枚舉蓋四十年於茲矣則其功亦烏可量夫有其

德則有其言有其言則有其功當斯世求如太翁

之爲人誠不數數覲璿等辱在葭葦素蒙塵誨或

有過訪無不委曲周詳故心獲其教益者不一而

足璿等方望其享期頤登上壽群奉爲祭酒何年

甫古稀遂人琴云亡凡族黨姻親及兩淮諸君子

於何考德而問業焉天之報施善人爲何如也雖

然我六翁屢邀

宸翰

天子知名翩翩哲嗣或身到鳳池或賢傳豹轂馳驅王
路者日見其翩翩聯未有艾矣太翁之食報又爲何
如亦安得有或朽之一日哉璿等爲太翁悲者且
藉是爲太翁慰矣敬修一奠用竭微忱神其不昧
來格來歆尚

饗

維

康熙五十五年歲次丙申四月庚寅朔越五日甲
午眷弟安尚仁偕男崧謹以剛鬣柔毛清酌庶饗
之儀致奠於

皇清誥封光祿大夫內閣中書加十二級景翁項老封
翁之靈曰嗚呼惟元精之儲粹生吉人於天壤如
景星與慶雲爲斯人之共仰況幸藉爲知交獲承
夫高朗胡奄然而棄世遂徜徉夫遐方悲昊天
之不弔俾魂驚而神愴嗚呼惟公至性過人天才傑
出奉尊人而避賊寇同江革之令人感惻天性孝
友孺慕不衰敦崇信義殫懷調恤誘掖人倫津梁

水澤是以業隆以起素志用酬龍光被寵燕翼貽
謀仁夙叨知契坦白一心終始靡間以至於今每
蒙諄切之誨恒奉周旋於夕昕所以仰公之偉度
而感公之雅忱者也蓋公賦性穎異卓軼不羣慕
四方以爲志占形勝而南行業策煮海名振邗濱
凡同人之決策莫不質於老成是以條陳利弊抵
掌公卿止求通商而裕國罔避忌諱而徇情因是
當代諸大人莫不折節而傾心也前此

聖駕南巡憫商困之莫支公與同輩入覲

天顏而請帑緩追錫

御書賜克食至今世猶以爲竒至其覲縷懿行增重鄉

評旣敬宗而尊祖亦友弟而恭兄往來故山修葺
宗祠義田廣置貧族咸寧築堤障水何憂乎駭浪
之奔騰恩及外戚繼絕舉而寧馨我公真屬一代
之矜式近今之典型也况令子文孫已登仕版

榮封極品奕世恩榮庶得比乎錢鏗胡濫先朝露騎箕
尾以上升嗚呼雲煙慘澹總帳淒其庭除如昔曷
覲丰儀溪毛用翦醴酒在卮神其來格鑒我依依
嗚呼尚

饗

維

康熙五十五年歲次丙申四月庚寅朔越二日辛卯年家眷晚生黃彛偕姪廷清廷忠男濱謹以辨香束帛清酌庶饗之儀致祭於

皇清誥封光祿大夫內閣中書加十二級景翁項太翁先生之靈而言曰嗚呼為天子經理財賦鉅任也司農歲抄量入億千萬數內鹽筴為多而兩淮之鹽筴尤甲於諸省故

宸衷簡畀慎擇齷憲道憲斯亦得人而理之意也業齷者雖甚衆必推一老成練達者為宗而齷憲道憲咸倚重焉開國以來嘖嘖有聞人其善始善終歿

而悼惜其才歌思其德如我翁者未易屈指數也
嗚呼翁卓犖不羈人也淵通博雅人也尊祖敬宗
睦婣任卹人也造家於艱難而於財不甚惜以修
祖廟至孝也以周六親至仁也以恤貧乏以濟孤
寒至義也子姓繩繩肅承庭訓而皆能有成至慈
也官於陝者有廉能之聲官於內閣者有清要之
目

褒封一品上及三世至榮也嗚呼如翁之雄才大略用
以宰天下其功必卓卓可稱道而僅以魚鹽終亦
翁之高致不沾沾於章句不汲汲於仕進大才而
小試之然而當代大人先生無不引重於翁如浩

軒徐公少同研席東海徐公平湖高公皆賢士大
夫而訂交結好焉他若後先視齟於揚者靡不相
知以國士蓋有其才而出人頭地者自不能揜耳
曩忝交未有年所矣聆翁之訓誨不後於人今病
臥牀第不能登翁之堂望靈瞻拜揮淚而銜哀特
遣男濱告於左右追惟夙昔之好落落晨星孰使
我亦至於此者當亦翁之所冥鑒歟嗚呼尚
饗

維

康熙五十五年歲次丙申夏四月庚寅朔越二日
辛卯通家眷晚生姚恭率男晚學生潛謹以辦香
束帛清酌庶饗之儀致奠於

皇清誥封光祿大夫內閣中書加十二級景翁項老先
生之靈曰嗚呼先生實為余之楷模故雖身羈姑
孰而不能一刻忘先生謦欬之音亦如或有見閨
月朔道蕪陰晤先生猶子伊泰詢起居道先生疾
革亟謀歸省視趣舟子速行至鑿水即得訃音矣
嗚呼方今之賢豪為

朝廷眷注如先生者其寧有幾一旦為天奪真令人悲

傷於邑震悼慘痛有踰尋常萬萬而予之哭先生者則又非泛泛比也憶乙卯歲予內交先生予雖絀於才而誠慤自矢不敢戾古人信之一字先生於時即窺見至隱不以衆人遇我迄今四十餘載先生時加獎掖予亦愈竭素忱嗚呼人之相知貴相知心予與先生同耶異耶癸巳春

皇上萬壽先生亦年七十予隨赴都慶賀當乘軒就道時神氣栩栩然偕行諸君共謂先生爾許彊健良爲近今所稀一路飲噱歡聚未嘗斯須間詎經青駝寺而先生忽患足予與二三君子勉勸還里養攝蓋不欲以跋涉煩苦先生也旣而歸見先生平

善竊喜甚因私自幸曰某公無恙典型弗墜予輩恒有依歸焉居未久值姑浦請齋同時六公咸舉予往予自度拙於術恐覆餗固辭之迺先生召而勗之曰吁夫事無大小惟謹慎者克勝數十年來吾知子審矣是役也微子不可其毋辭予感知已之深勉爲南行然終以睽違先生色笑爲歉故歸時聚首言歡或湖上之游或桂圃之飲自春徂秋曾未少怠今春王廿二日候謁雖體健似遜於前而容貌辭氣無疲繭狀用是益不爲意孰謂甫兩閱月而先生竟溘逝耶嗚呼痛哉先生壽踰古稀榮膺極品名冠全淮且長君宏才博學秩授主政

次君筮仕陝右行銓憲副叔與季或鬻官或成均
皆奕奕有聲諸孫矯然特立四世濟美先生亦可
無憾於九京矣予少先生五歲僅一子予既失山
梁之仰兒不獲承喆人之教謂予之悲痛不亦甚
乎至先生德行昭彰上而名卿大夫下而庸人孺
子皆能周知詳道予又何述焉惟是思君子而不
見不識復能於羹牆夢寐之際一再覲其音容否
嗚呼尚

饗

維

康熙五十五年歲次丙申四月庚寅朔越祭日壬
子年家眷教弟程煊眷晚生程鶴疑謹以辦香束
帛清酌庶饗之儀致祭於

皇清誥封光祿大夫內閣中書加十二級景原項太翁
先生之靈而言曰嗚呼古所謂卓然傑出之士其
德業所著聞譽所垂以成不朽者雖曰稟天地之
英鍾川嶽之秀而然也要亦其畢生所爲履仁蹈
義有以默契彼蒼故能受天眷乃爾如我太翁足
徵已邇自篤生秀質穎異絕倫甫成童即負笈西
泠業成而歸累試前茅父老謂績學如是取功名

祭軒集卷一
如拾芥他日必亢吾宗而太翁則以堂上春秋高
苟事帖括而缺甘旨子職之謂何於是挾策維揚
留心齟務會山寇侵掠故鄉聞信則迎養邗上當
是時業隆隆日起舉凡可以博兩親歡者靡不先
意承順迨高堂年踰大耋後先令終哀毀骨立之
餘扶櫬歸葬而牛眠吉壤則又從夢寐中得先人
指示謂非仁孝之思烏能感召至此厥後以齟政
莅斯土者咸引重太翁四方之冠蓋至止者咸納
交太翁蓋太翁之才識足以幹世而超俗故為當
道貴遊所樂交而兩淮之同業者亦莫不推服既
而以齟政事上陳

行在仰荷採納復賚

御書克食遭逢曠典世以為榮於是太翁之聲稱益藉
藉江淮間矣然太翁雖僑居維揚而本源念篤常
往來故鄉自修築宗祠塋域外於郡之學宮及先
賢讀書論文處俱不惜輸貲繕葺以還舊觀他如
置義田而窮簷賴以存活資膏火而寒士賴以嚮
學以至內而宗黨外而戚屬凡婚嫁喪葬及終歲
所需咸使有藉生平持己以敬待人以誠遇商權
必忼慨指陳覩爭競必力為排解自奉淡約華靡
是戒暇則讀書一室臨摹法帖會心有得則吟咏
以寫性靈迹其七十餘年行誼悉皆可法可傳是

故功德之隆保世滋大長君以中翰起家聲著鑾
坡今晉秩部曹將含香畫省次君佐郡延安甘棠
留咏榮躋岳牧崇班叔季兩君並稱國器孫曾森
秀盡屬石麟而太翁光被

寵命榮及先世俱得贈階一品將見懸之史冊以太翁
之卓然傑出者為奕世儀表吾於是知天之眷顧
乃爾者能履仁也能蹈義也能默契彼蒼也今太
翁騎箕長往當必輾然含笑矣惟是煊等一旦典
型失瞻臨風追憶曷禁悲悼聊藉椒漿之奠用申
哀悼之忱靈爽非遙仰祈鑒格嗚呼尚
饗

維

康熙五十五年歲次丙申四月庚寅朔越三日壬
辰年家眷晚生王楨棟模標宜爵璣謹以辦香束
帛清酌庶饗之儀致祭於

皇清誥封光祿大夫內閣中書加十二級景翁項太翁
先生之靈而言曰嗚呼人孰無死而有生之榮者
死獨不朽蓋生人之福一曰富一曰壽一曰多男
子三者俱備而有道以處之則能善享而無累榮
何如也顧世之膺斯全福而處之以道者寧有幾
人楨等惟於我太翁見之太翁真所謂生極其榮
死誠不朽矣太翁系出新安高門大闕代不乏人

其祖功宗德足以邀天之眷而克昌子孫者甚厚是以毓秀於我太翁生而穎異學問夙成及稍長而試之事具見經濟大猷實

廟堂之器非閭里之英也有識者咸器重之及小試之業齟而其言齟政利弊不啻燭照數計當事心折焉同輩亦羣推爲祭酒一時國計賴之以紓商業賴之以振而且情殷推解周急扶危凡一切厚於三黨之事無一不爲是昔人所云有財能分富而不憂其多事者也太翁言動不苟金玉自持而性復恬適當其晉爵一品

皇家異數旁觀者皆以爲榮而太翁不色喜居常愛臨古帖兼以詩酒自娛今令終之日年逾古稀是昔人所云與物皆昌修德就閒壽而不憂其多辱者也抑舉丈夫子四長君入直內閣次君佐守名邦皆以素絲勵節拔擢超遷其叔季抱經濟才亦指日爲

王朝柱石而孫曾林立復如蘭英秀茁要皆太翁示以義方得力於過庭之訓是昔人所云授之職業多男子而不憂其多懼者也太翁膺斯全福而處之有道能善享而不爲所累詎非生極其榮者乎今即音容杳渺而靈爽不昧夫復何憾哉第楨等追隨太翁尊聞行知罔不奉爲司南茲倏棄楨等而

祭輓集卷十
長逝吾儕小子如顏泰山如壤梁木其將安仰而
安放乎束帛辨香虔申鄙悃太翁不忘夙昔之好
其臨風而舉楨等一觴嗚呼尚

饗

維

康熙五十五年歲次丙申四月庚寅朔越三日壬
辰年家眷晚生陸時達謹以辨香束帛清酌庶饌
之儀致祭於

皇清誥封光祿大夫內閣中書加十二級景翁項太翁
老先生之靈而言曰嗚呼太翁之溘焉長逝也晚
遽聞之輒驚怖哀感有不自勝者蓋人之福壽聽
之於命不齊之致未可強也而立身涉世偉然丈
夫於古哲昔賢相為先後此實為難由斯以觀福
壽者恒多賢哲者殊罕見也今太翁有以兼之矣
太翁譜系始自周及楚漢相屬以來英尤代起高

隱逸掇巍科文章理學往往不絕是所謂卓然名家者唐乃遷歛居小溪晚先世同里開有洽比之誼永歷年所傳至太翁軒軒不羣少習舉子業試輒冠軍士林推重爰念尊人春秋既高甘旨為念不欲以揣摩廢治生於是謝去帖括經營四方托足邗水持籌握算家業日隆暨為鹺務當道利弊咸諏諮焉殆詢於黃髮之意也當代名公巨卿覲面聞聲靡不傾倒優崇且親覲

天顏蒙加

頒賜可云拜荷

殊恩矣令嗣經士書存養初仰山諸先生或列朝班或

光庠序文章政事彪炳人間一切行止悉遵庭訓孫曾濟濟如蘭如桂芬芳馥郁太翁之福何如也年七十有三古之所稀猶有加焉詎不為壽耶及稽太翁之生平大節養志承歡問寢視膳擗踊哀毀昇櫬營域克盡子職於孝何忝修祠以閔先祀一而至再不惜捐貲水源木本時牽懷抱若夫遺像則重價求之石堤則鳩工築之效文正之廣置義田法君子之不忘故舊慷慨激昂亢直無隱排難解紛亦婉曲而有條未婚者為之婚未嫁者助之嫁自親族以及鄉里沐澤者指不勝屈太翁之賢誰謂不並於古昔傳人哉他和以待人寬以

馭下又特其末耳然則太翁之福壽命之於天固
非人之所能望其萬一而嘉言媿行則輓近澆漓
必不克倣其醇備斯豈非太翁之福壽晚已深爲
慶幸而太翁之賢哲晚更仰慕無窮也哉第悵快
者晚與太翁旣切鄉井之好復叨親戚之末追隨
左右獲領誨益常耿耿於中也詩云雖無老成人
尚有典型今老成凋謝典型安在此晚所爲驚悼
哀感誠有不自勝者矣薄具一觴用寫鄙忱神其
有知伏惟來格尚

饗

維

康熙五十五年歲次丙申四月庚寅朔越三日壬
辰年家眷晚生高侶謹以辦香束帛清酌庶饜之
儀致祭於

皇清誥封光祿大夫內閣中書加十二級景翁項老先
生之靈而言曰昔箕子陳洪範九疇次五福於庶
徵一曰壽二曰富三曰康寧四曰攸好德五曰考
終命而皇極之言又曰予攸好德汝則錫之福豈
非以德居福之一實爲福之本德立而福始備歟
然五者或係於天或係於人或由於理或由於數
求其得乎天人理數之全兼致無遺者每不能獲

什一於千百若我太翁真無遺憾矣太翁享年七十有三此古所稀有記所謂老而傳也躬膺

鳳誥榮褒華袞長公密勿絲綸次君分符劇郡叔季奮翼詞壇列鼎鳴鐘家食皆匪頌也平昔精神矍鑠中懷洞達光明易箠之餘語不及私但云胸無一事然則太翁固已壽而富也康寧而考終也而所以然者則致之有本其好德無窮也太翁簪纓華胄先世祠壇塋兆盛甲一郡歲久寢圯獨捐數萬之貲修葺一新無忘先澤孝思感格俾前代數十世衣冠偉容忽得於喪失之餘則德之承先者厚也宗人食指數千倣文正公義田之法廣為贍給

且修堤堰水措千室於磐石之安則德之睦族者大也庭訓以清白相承是以諸嗣君先生益清慎自矢賢聲丕著在位奉為楷模而階前玉樹繩繩相繼鵲起鵬飛皆英才偉器則德之善後者遠也復外家已失之塋田延近戚已絕之宗祀而德及三黨危困者賴以引手終窶者待之舉爨而德周友朋他如獎進人才施予不倦御衆以寬率下以儉其懿美殆非口舌所能罄者以如是之德自宜福之畢臻是以壽則幾大耋矣乃耄而好學非罔之生也富則享祿養矣乃推恩媵睦非怨之府也康寧則生平無纖悉之青心逸而形泰也考終命

則全受全歸又非沒沒無聞老於牖下者可同日
語也太翁真今世之完人哉侶生也晚素仰風徽
邇年以來益親几杖每見同人議論太翁指陳擘
畫無不悉中機要衆莫能易長淮南北綱紀者數
十年自昔視齟使者莫不相引重吾黨倚賴甚深
豈意一旦奄忽而逝耶典型頓失已不勝死生存
歿之悲况以太翁得乎天人理數之全爲世所罕
覩又烏能已於寢門之痛耶薄具生芻用申虔奠
庶幾來格來歆尚

饗

維

康熙五十五年歲次丙申四月庚寅朔越三日壬
辰年家眷弟江清汲汪灝等謹以剛鬣柔毛瓣香
束帛清酌庶饁之儀致祭於

皇清誥封光祿大夫內閣中書加十二級耐菴項老年
親臺之靈而言曰嗚呼邗江著德久倚斯人練水
鍾靈天遺一老樂善解紛賦性獨持公正棄儒服
賈居家仍嗜詩書德及於人而人或未之覺福來
自天而天亦不易知昔者淮商旣困齟政難行望
北闕而陳情雖從者衆邀

南巡之

聖澤首建乎公世學晚勤於子弟家聲早震於寰區將
見應制之堯夫不難入相即今助邊之卜式已勝
登瀛况後起之駸駸紹先疇而奕奕雖荀氏之龍
何足多焉而薛家之鳳有不逮矣此皆我太翁樹
德之深而肇基之遠也嗚呼小子何知生而已晚
嘆親炙之無時恨趨承之日罕獨是先人生同管
鮑之歡義結雷陳之契清等私淑餘光屢懷夙好
感晨星之落落戀總帳而依依敬陳薄奠靈其鑒
諸尚

饗

祭輓彙錄卷十



